

四庫全書

史部

欽定四庫全書

史部

錢通卷三至五

詳校官編修

臣溫汝适

編修

臣

程嘉謨覆勘

總校官中書

臣朱

鈐

校對官中書

臣王

瓚

謄錄副榜

臣王

宮

欽定四庫全書

錢通卷三

明 胡我琨 撰

一之原

貨一而命司焉者泉為多泉居三幣之下治氏
執齊改煎金錫知者創焉巧者劑之眡其物而
歛其產然後貫利聖人之有作也揭而式其原
則是以克鑄故原曰一

稽始

自太昊以來則有錢矣太昊氏高陽氏謂之金有熊氏
高辛氏謂之貨陶唐氏謂之泉商人齊人謂之布齊人

莒人謂之刀

文獻
通考

神農列剏於國以聚貨帛日中為市以交有無虞夏商
之幣金為三品或黃或白或赤或錢或布或刀或龜貝

史記

黃帝時采香山之金鑄刀此刀之始也範金為貨制金

刀立五幣以制國用貨幣之制始也

原始

管子曰禹五年水民之無糧賣子者禹以歷山之金鑄幣贖之此錢幣之始也

管子曰湯七年旱民之無糧賣子者湯以莊山之金鑄幣贖之

周景王鑄大錢文曰寶貨錢有文其製始此

原始

秦始皇行半兩錢古人錢字作泉自是始稱錢而後之八銖四銖皆原於此

前漢食貨志曰太公為周立九府圜法錢圜函方輕重以銖

漢文帝時除盜鑄錢令使得自鑄後世弛錢禁始此

原始

南北朝宋西羌未平東海王上錢二十萬助國諸王獻助始於此

梁始鑄鐵錢以鐵為幣始見於此

隋賦民錢造佛圖經像此又增一賦也始見於此

唐高祖初行開通元寶錢後世錢文用寶字始此

玄宗以玉璽為祠祭使用楮為錢以祭後世用紙錢代幣始此

唐代宗稅青苗錢給百官俸青苗之名始見於此

德宗兩稅外取一錢者以枉法論行兩稅法始此初行稅間架除陌錢法

五季楚鑄鉛鐵錢以鉛為錢始見於此

唐初聽民鑄田器計畝稅錢稅田器始此徵諸郡丁口鹽錢後世徵戶口食鹽鈔始此

周世宗發引之日金銀錢寶皆寓以形而楮錢大如盞口其印文黃曰泉臺上寶白曰冥遊亞寶據此則金銀楮錠亦始於五代也

宋徽宗科免夫錢初收經制錢先是經制錢為東南七郡之害

高宗初置見錢關子始收諸路月椿錢又一稅也

稱元寶自唐高祖始稱重寶自唐肅宗始稱通寶自宋人誤讀開通錢文始改元更鑄自宋太宗始

俱同上

丘濬曰臣按鑄錢以年號為文始於劉宋孝建宋自開寶每更一號必鑄一錢

左編

釋義

錢之為幣以銅為之體圓孔方背面俱似皆有周郭周

流四方之象也

事類合璧

以珠玉為上幣以黃金為中幣以刀布為下幣

管子

夾漈鄭氏曰謂之泉者言其形謂之金者言其質謂之刀者言其器謂之貨謂之布者言其用古文錢字作泉

者言其形如泉文一變而為刀器再變而為圜法自圜法流通於世民實便之故泉與刀為廢後人不曉其謂也觀古錢其形即篆泉文也後人代以錢字故泉之文借為泉水之泉其實泉之篆文下體不從水也

文獻通考

錢有字謂之面錢漫曰幕又曰幕皮師古曰呼錢背為幕皮者謂其平而無文也

鉛銅屑也摩錢漫面以取其屑更以鑄錢也

偽錢私鑄之錢

緡疆穿錢索也

采山銅以為錢煮海水以為鹽

伍被傳

泉府上士四人中士八人下士十六人

周景王二十一年將鑄大錢以振救人於是乎有母權子而行母重也重大倍故為母子輕也輕小半故為子

國語

武帝時鑄官赤仄錢漢書音義曰俗所謂紫紺錢也

武帝又造銀錫白金以為天用莫如龍地用莫如馬人

用莫如龜故白金三品

前漢食貨志

張宴曰按今所見契刀錯刀形質如大錢而肉好輪厚異於此大錢形如大刀環矣契刀身形員長不二寸也其文左曰契右曰刀無五百字也錯刀則刻之作字也以黃金填其文上曰一下曰刀二刀泉甚不與志相應也似札單差錯文字磨滅故耳

張宴論

如淳曰莢錢如榆莢也

惠帝紀云視作斤上者將軍四十金鄭氏曰四十金四

十斤金也晉灼曰近上二千石賜錢二萬此言四十金實金也下凡言黃金真金也不言黃金錢也食貨志黃金一斤直萬錢也後漢何休注公羊百金之魚亦謂一金萬錢緇素雜記引一金萬錢以證晉王導所市練布之價則是一金萬錢不但秦漢為然自三代至晉莫不皆然何千百年間金價一律如此今日之價視古又何

倍蓰耶

野客叢書

貨寶於金利於刀如淳曰名錢為刀以其利於民也莽

造錯刀蓋身形如刀以黃金錯其文曰一刀直五千錯

塗也

食貨志

開元錢之文歐陽詢制詞其字含八分及隸體其詞先上後下次左後右讀之自上及左迴環讀之其義亦通

俗謂之開通元寶錢

食貨志

泉府則以錢易貨常平則以錢易粟其本意皆以利民非謀利也

王莽時主鑄錢官曰鐘官

漢官志

撲滿者以竹為竅為蓄錢具有入竅而無出竅滿則撲之

俗語謂錢一貫有畸曰千一千二米一石有畸曰石一石二長一丈有畸曰丈一丈二之類亦有所本按考工記父長尋有四尺注曰八尺曰尋父長丈二

容齋
隨筆

錢以文言南史武林王畢華林園射賜錢五萬文

王昭禹曰古者寶龜而貨貝所以交易者惟貝而已至太公立九府圜法始用錢代貝或曰錢或曰布布取宣

布之義泉取流行之義其實則一而已臣按後世之錢其形質外圓內方始此但未有文耳九府即周禮所載九官是也九官皆掌財幣之官而所掌者黃金布帛錢幣三者黃金以斤名布帛以疋計錢幣以銖重故凡貨物之出入其輕重以圜法均而通之如黃金一斤該錢若干帛一疋該錢若干之類是以國家有所用度也一切皆財貨寶之以金利之以刀流行之以泉施布之以布收聚之以帛所謂金即方寸重一斤者所謂刀即管

子所謂刀為下幣者所謂泉即園法也所為布帛即長

四丈為疋者

大學衍義補

按宋朝交子至是更名會不特此也又謂之錢引又謂之關子又謂之關會其實一而已矣考夫唐之飛錢合契特以通商賈之厚齎貿易者蓋執券以取錢而非以券為錢也宋自真宗以後蜀始有交子高宗以後東南始有會子而始以紙為錢矣

同上

金者金銀銅錫之總名按五行地四生金是也

財貨源流

赤金丹陽銅也

漢食貨志注

今江湖間俗語謂錢之薄惡者曰慳錢按賈誼疏云今法錢不立農民失其耒耜治鎔炊炭姦錢日多俗音誤

以姦為慳爾

鶴林玉露

錢泉也其藏曰泉其行曰布取名流行無不徧也

周禮註

今之錢數百錢謂之陌借陌字用之其實只是百字如什與伍耳唐自皇甫鑄為塾錢法至昭宗末迺定八十為陌漢隱帝時三司使王章每出官錢又減三文以七

十七為陌輸官仍用八十

筆談

太公立太府王府內府外府泉府天府職內職金職幣皆掌財帛之官故云九府圜即錢也謂均而通也

大錢文曰寶貨肉好皆有周郭肉錢形也好錢孔也

漢書

錢鉼也古田器从金𠂔聲詩曰庠廼錢鋪

許氏說文

前代錢文未有艸書者宋淳化中以宸翰為之始有艸

書者書成上以示近臣

侯鯖錄

緡錢二十而一筭李斐曰緡絲也以貫錢一貫千錢出

算二十也陌即百字唐以八十錢為陌宋以百錢為陌

筆
廬

唐莊宗置酒錢庫令其子繼岌為張承業起舞指錢積曰

和哥乞錢盡以錢一積與之錢積二字始此

筆
廬

穀梁傳曰乘馬曰賵衣帛曰襚貝玉曰含錢財曰賻

導引曰倉收米穀者也庫收錢帛者也辯疑云大曰倉小曰庫藏錢穀之所也始於陶唐兵軍所藏曰庫金帛所藏曰帑始於湯武

課者稅物之錢鈔也程者物有貴賤課有多寡如地里之有程限也

綺錢苔錢也

法錢依法所製之錢也

乾封元年封岳之後改造新錢文曰乾封泉寶初開元錢俗謂之開通元寶錢及鑄新錢乃同流俗乾字直上封字在左尋寤錢文之誤却用舊錢

舊唐書
食貨志

資採

荊州厥貢金三品

禹貢

古者金有三品赤金為下

食貨志

黃帝問於伯高曰吾欲陶天下以為一家有道乎伯高曰請刈其莞而樹之吾謹逃其爪牙則天下可陶而為一家夫上有丹砂者下有黃金上有慈石下有銅金上有陵石下有鉛錫赤銅上有赭下有鍊此山之見榮者也苟見其榮君謹封而祭之距封十里而為一壇是則使乘者下行者趨若犯令者罪死不赦然後斫取之以

為劍鎧矛戟

管子

天下銅坑五十歲采銅二十六萬六千斤

唐史

山上有葱下有綠山上有薤下有金山上有薑下有銅

錫山有寶玉木旁枝皆下垂

酉陽雜俎

小次山其上多白玉其下多赤銅孟山其陰多鐵其陽

多銅咸山其上有玉其下多銅陽山其上多玉其下

多金淩山其上多赤銅其陰多鐵糧谷之山其中多

赤銅鼓鐙之山多赤銅昆吾之山其山多赤銅

此山出名銅色

赤如火

蠱尾之山多礪石赤銅 柰陽之山其陽多赤金

其陰多白金 松果之山獲水出焉北流注于渭其中

多銅 符禺之山其陽多銅其陰多鐵 瑯瑯之山其

陰多銅 英山其陰多鐵其陽多赤金 竹山其陰多

鐵 瑜次之山其陰多赤銅 二經之首曰鈴山其上

多銅 泰冒之山其陽多金其陰多鐵 龍首之山其

陽多黃金其陰多鐵 西皇之山其陽多金其陰多鐵

烏山其陰多鐵 求如之山其上多銅 號山其陰

多鐵 潘侯之山其陰多鐵 渾夕之山無艸木多銅
玉 縣雍之山其上多玉其下多銅 諸餘之山其上
多銅玉 鉤吾之山其上多玉其下多銅 京山其陽
有赤銅 軒轅之山其上多銅 少山其上有金玉其
下有銅 柘山其陽有金玉其陰有鐵 維龍之山其
上有碧玉其陽有金其陰有鐵 白馬之山其陽多玉
其陰多鐵多赤銅 乾山無草木其陽有金玉其陰有
鐵 柄山其上多玉其下多銅 密山其陽多玉其陰

多鐵 索山其陽多金其陰多鐵 夸父之山其陽多
玉其陰多鐵 少室之山其上多玉其下多鐵 役山
之上多白金多鐵 荆山其陰多鐵其陽多赤金 岐
山其陽多赤金 銅山其上多金銀鐵 玉山其上多
金玉其下多碧鐵 仁舉之山其陽多赤金 岐山其
上多白金其下多鐵 玉山其陽多銅其陰多赤金
騶山其陽多美玉赤金其陰多鐵 葛山其上多赤金
虎尾之山其陽多赤金其陰多鐵 雅山其下多赤

金 丙山多黃金銅鐵無木 洞庭之山其上多黃金

其下多銀鐵 陽帝之山多美銅 滎余之山其下多

銅其下多銀

俱山海經

綠銅之苗也亦出右江有銅處生石中質如石者名石

綠又有一種脆爛如碎土者名泥綠品最下價亦賤

桂海

虞衡志

真宗咸平四年舊制犯銅禁七斤以上並奏裁處死詔
自今滿五十斤以上取裁餘第減之天禧三年詔犯銅

鑄石並免極刑

宋史

高麗地產銅周世宗時遣尚書水部員外郎韓彥卿以

帛數千疋市銅于高麗以鑄錢

王氏
彙苑

孔帖高麗貢銅五萬斤

鹽鐵使李巽以郴州平陽銅坑二百八十餘復置桂陽
監以兩鑪日鑄錢二十萬天下歲鑄錢十三萬五千緡
命商賈蓄錢者皆出以市貨天下有銀之山必有銅惟
錢無益於人五嶺以北採銀一兩者流他州官吏論罪

唐史

河北諸州舊少錢貨猶以他物交易錢畧不入於市二年冬尚書崔亮奏弘農郡銅青谷有銅鑛計一斗得銅五兩四銖葦池谷鑛一斗得銅五兩驚帳山鑛一斗得銅四兩河內郡王屋山鑛一斗得銅八兩南有青州苑燭山齊州商山並是往昔銅官舊迹見在

六朝史

天下名山五千三百七十出銅之山四百六十七出鐵之山三千六百九十

山海經

魏採銅鑄錢崔亮請於王屋等山採銅鑄錢從之是後

民多私鑄錢稍薄小用之益輕

會編

西方日官之外有山長十餘里廣二三里高百餘丈皆
大黃之金不雜土石上有金人高五丈餘皆純金名曰
金犀入山下一丈有銀又入一丈有錫又入一丈有鉛
又入一丈有丹陽銅其銅似金可鍛以作錯塗之器也

神異經

益州行事劉悛上言蒙山下有嚴道銅山舊鑄錢處可

經濟類編

以經畧武帝從之遣使入蜀鑄錢頃之以功費多而止

韓泗上言今商州紅崖治產銅而洛源監久廢請鑿山

取銅即治舊監置十爐鑄之得錢十萬二千緡

孔氏帖

宋張齊賢初除轉運使太宗謂曰江南多出銅即為朕

密經營之齊賢乃訪江南承旨丁釗歷指饒信處州山

谷產銅鉛錫之所又求前代鑄法惟饒州永平監周唐

開元錢料堅實可久于是定取為法歲鑄三十萬貫凡

用銅八十五萬斤鉛三十六萬斤錫十六萬斤齊賢詣闕面陳其事帝許之

越絕書若耶之溪涸而出銅戰國策涸若耶溪以取銅是也

丘濬云宋朝金銀銅鐵鉛錫之冶總二百七十一皆置吏主之大率山澤之利有限或暴發輒竭或採取歲久所得不償所費而歲課不足有司必責主者取盈臣按宋朝坑冶所在如此之多而元朝之坑冶亦比今日加

十數倍何也蓋天地生物有與地土俱生者金銀銅鐵之類是也昔者聖王定為取民之賦有米粟之征而無有所謂金銀銅鐵之征者豈不以山澤之利與土地俱生取之有窮而生之者不繼乎坑冶之利在前代則多在後代則少循歷至于今日猶其少焉無足怪者我朝坑冶之利比前代不及什之一二間或有之隨取隨竭曩者固已于浙之溫處閩之福建開場置官令內臣以守之差憲臣以督之然所得不償所費如宋人所云者

今則多行革罷而均其課於民賦之中矣雖然今日不徒不得其利而徃徃又罹其害蓋以山澤之利官取之則不足民取之則有餘今處州等山場雖閉而其間猶不能無滲漏之微利遺焉此不逞之徒猶囊橐其間以競利起亂也為今之計宜于坑塲遺利之處嚴守捕法可築塞者築塞之可柵塹者柵塹之俾其不至聚衆爭奪以貽一方生靈之害可也

皇明經
濟錄

地鏡圖云青草莖赤秀下有鉛

永昌郡中亦有金焉纖靡大類黍粟在水涯沙中民採得日重五銖之金一色卮黄土生金土色黃漢土德也故金化出金有三品黃比見者黃為瑞也

王充論衡

姑墨川水注之尊姑墨西北赤沙山東南流逕姑墨國西治南至於闐馬行十五日土出銅鐵及雄黃

水經

丹陽山東北逕治東俗謂之丹陽城城之左右猶有遺銅矣

若水又逕會無縣縣有駿馬河水出縣東高山山有天

馬徑厥跡存焉馬日行千里民家馬牧之山下或產駿駒言是天馬子河中有貝子胎銅以羊祠之則可取也

同上

銅井山在縣西七十里上有銅井一名銅官山一統志謂銅井去縣西北五十里廣十餘丈深不可測舊于此

采銅有魚出其中其色如金

滁州府勝志

銅坑山鄧尉山西南一名銅井晉宋間鑿坑取沙土煎之皆成銅故名上有巖洞其懸溜漚而為池清冽可飲

名曰銅泉

蘇州府志勝

岑水一名銅水可浸鐵為銅其水極腥惡石色皆赭然

不生魚鼈禾稼之屬即曲江膽礬水同源異流也

廣東勝名

志

明光山在騰越州西北一百二十里上有銀鑛銅鑛

永昌

府志勝

陽碧山在陽山縣西南十里高出衆山日光先照故名
兩峰上聳狀如丫髻亦名丫髻山又南七十里產銅者

曰銅沙山東三十里產黑鉛者曰寶源山

廣東名勝志

梁水郡置在盤江南管二縣曰梁水縣有振山出銅曰
賁古縣有采山出銀鐵銅鉛又興古有律高縣縣西為
石空山東南盤町山俱出錫故滇畧云錫則臨安者佳
最上者為芭蕉葉扣之聲如銅鐵其白如銀作器殊良

臨安府志勝

鉛山在鉛山縣西北七里又名桂陽山又名楊梅山舊
經云山出鉛先置信州之時鑄錢百姓開採得鉛什而

稅一建中元年封禁貞元年置永平監其山亦出銅及
青碌又有寶山連桂陽出銅又銅寶山在縣西南七里
一名七寶山下有竹葉猓平坑石竅中膽泉湧出浸鐵
成銅天久晴有礬可拾建隆三年置銅場今廢其銅以
土垢淋水浸鐵為之

廣信府志勝

鎖山門浸銅之所在縣鵞湖鄉去治七十里許有溝漕
七十七處興于宋紹聖四年更創于淳熙八年縣尉馬
子巖有銘至淳祐後漸廢其地之水有三膽水礬水黃

礮水各積水為池每池隨地形高下深淺用木板閘之以茅蓆鋪底取生鐵擊碎入溝排砌引水流通浸染候其色變鍛之則為銅餘水不可再用信州鉛山膽水自山下注勢若瀑布用以浸銅鑄冶是賴隨天旱澇而有涸溢大抵盛於春夏微於秋冬古傳一人至水濱遺匙鑰翌旦得之已成銅矣近年水流斷續浸銅頗費工力凡古坑有水處曰膽水無水處曰膽土膽水浸銅工省利多膽土煎銅工費利薄水有盡土無窮今上林三官

提封九路簡踏無遺膽水膽土官亦兼收其利按浸
銅之說自昔無之始因饒州布衣張甲獻言可用膽水
浸鐵為銅紹聖元年始令本州差廂軍興浸其利漸興
紹興二年朝議以坑冶所得不償所費悉罷監官以縣
令領其事

安陽縣西北有銅山山多產銅

鉛山縣地出銅鉛青碌置場以收其利舊在寶山偽唐

昇元二年遷置鵝湖山

同上

劄龍山在路南州東八十里山下有小石可煉為銅

江徽

志

錢通卷三

欽定四庫全書

錢通卷四

明 胡我琨 撰

二之制

王者尊八柄之法不征市而布作焉皆以質媿
惡為輕重之紀而頒之邦國戒民侵債巡而考
其犯禁者罰之凡五布之有徵也者均而入於
泉府各循脩廼制故制曰二

代更

周景王二十一年將更鑄大錢單穆公曰不可王弗聽

卒鑄之

國語

孫叔敖為楚相莊王以為幣輕更以小為大百姓不便相言之王復如故王許之

史記

秦兼天下幣為二等黃金鎰為名上幣

上幣者二等之中黃金為上而

錢為下也銅錢質如周錢文曰半兩重如其文而珠玉龜貝

銀錫之屬為器飾寶藏不為幣然各隨時而輕重

通考

史記秦本紀云惠文王立二年初行錢

漢興以為秦錢重難用更令民鑄莢錢逐利之民蓄積
餘贏以致市物騰涌米至石萬錢馬至匹百金

漢史

前漢高后紀曰二年行八銖錢

前漢高后紀曰六年行五分錢

顧烜曰高后時既患莢錢之輕又苦秦錢之重故更鑄
八銖錢

前漢文帝紀曰五年夏四月除盜鑄令更造四銖錢

前漢武帝紀曰建元元年春二月行三銖錢

前漢武帝紀曰建元五年罷三銖錢行半兩錢

前漢武帝紀曰元狩五年罷半兩錢行五銖錢

前漢食貨志曰武帝又造銀錫白錢又鑄赤仄錢終廢
不行

史記平準書曰武帝鑄五銖錢郡國多姦鑄錢錢多輕
而公卿請令京師鑄鍾官赤側一當五賦官用非赤側
不得行其後二歲赤側錢賤民巧法用之不便又廢于

是悉禁郡國無鑄錢悉令上林三官鑄錢既多而令天下非三官錢不得行諸郡國所前鑄皆廢銷之輸其銅三官而民之鑄錢益少計其費不能相當惟真工大姦乃盜為之

食貨志曰自孝武元狩五年三官初鑄五銖錢至平帝元始中成錢二百八十億萬餘

光武紀曰建武十六年始行五銖錢注曰武帝始為五銖錢王莽時廢今始行之

王莽居攝變漢制以周錢有子母相權於是更造大錢
徑寸二分重十二銖文曰大錢五十又造契刀錯刀契刀
其環如大錢身形如刀長二寸文曰契刀五百錯刀以

黃金錯其文曰一刀直五十與五銖錢凡四品並行

漢史

莽以為書劉字有金刀乃罷錯刀契刀及五銖錢而更
作金銀龜貝錢帛之品名曰寶貨小錢徑六分重一銖

文曰小錢直一次七分三銖曰幺錢一十

幺小也

次八分

五銖曰幼錢二十次九分七銖曰中錢三十次一寸九

銖曰壯錢四十同前大錢五十是為錢貨六品直各如其文黃金重一斤直錢萬朱提銀重八兩為一流直一千五百八十它銀一流直千是為銀貨三品元龜卅冉長尺二寸直二千一百六十為大貝十朋公龜九寸直五百為壯貝十朋侯龜七寸以上直三百為公貝十朋子龜五寸以上直百為小貝十朋是為龜寶四品大貝四寸八分以上二枚為一朋直二百一十六壯貝三寸六分以上二枚為一朋直五十么貝二寸四分以上二

枚為一朋直三十小貝寸二分以上二枚為一朋直十不盈寸二分滿度不得為朋率枚直錢三是為貝貨五品大布次布第布壯布中布差布厚布幼布公布小布長寸五分重十五銖文曰小布一百自小布以上各相長一分相重一銖文各以其布名直各加一百上至大布長二寸四分重一兩而直千錢矣是為布貨十品

布亦

錢凡寶貨五物六名二十八品鑄作錢布皆用銅穀以

鍊錫

許慎曰鍊銅屬也然則以鍊及雜銅而為錢也鍊音連

文質周郭放漢五銖

錢云其金銀與他物雜色不純好龜不盈五寸貝不盈六分皆不得為寶貨元龜為蔡非四民所得居有者入太卜受直其後百姓憤亂其貨不行民私以五銖錢市買莽患之下詔敢挾五銖錢者為惑衆投諸四裔于是農商失業食貨俱廢民涕泣于市道抵罪者不可稱數莽知民怨廼但行小錢直一與大錢五十二品並行龜貝布屬遂廢莽天鳳元年復中下金錢龜貝之貨頗增減其價直而罷大小錢改作貨布長二寸五分廣一寸

首長八分有奇其廣八分其圓好徑二分半足枝長八分間廣二分其文右曰貨左曰布重二十五銖直貨錢二十五貨泉徑一寸重五銖文右曰貨左曰泉枚直一與貨布二品並行又以大錢行久罷之恐民挾不止廼令民且獨行大錢與新貨泉俱枚直一並行盡六年毋得復挾大錢矣每壹易錢民破業而陷刑莽以私鑄錢死及非沮寶貨投四裔犯法者多不可勝行廼更輕其法私鑄作泉布者與妻子沒為官奴婢吏及比伍知而

不舉告與同罪非沮寶貨民罷作一歲吏免官犯者愈
衆及五人相坐皆沒入郡國檻車鐃鑠傳送長安鍾官
愁苦死者十六七

文獻
通考

漢錢舊用五銖自王莽改革百姓皆不便之至光武中
興除莽貨泉建武十六年馬援又上書曰富國之本在
于食貨可如舊鑄五銖帝從之于是復鑄天下以為便

晉書食
貨志

宋書文帝紀曰元嘉七年冬立錢署鑄四銖錢二十四

年六月以貨貴制大錢一當兩明年五月罷

後漢靈帝紀曰中平三年鑄四出文錢

靈帝作角錢錢猶五銖錢有四道連有邊輪識者竊言
侈虐已甚形象兆見此錢成必四道而去及京師亂錢

果流布四海

文獻
通考

獻帝初平元年董卓壞五銖錢更鑄小錢悉取洛陽長
安銅人鍾簏飛廉銅馬之屬以充鑄故貨錢物貴穀石
數萬又錢無倫理文章不便人用

漢
史

顧烜曰漢獻帝建安十九年昭烈鑄直百傳形五銖
魏志曰文帝黃初二年春初復五銖錢冬以穀貴罷
明帝太和元年夏行五銖錢

吳志曰孫權嘉禾五年春鑄大錢一當五百

孫權赤烏元年鑄當千大錢故呂蒙定荊州賜錢一億
錢既大貴但有空名晉自中原喪亂元帝過江用孫氏
舊錢輕重雜行大者謂之比輪小者謂之四文

晉書食貨志

三月晉禁民作銅器初唐世天下鑄錢有三十六冶亂

喪以來皆廢絕錢日益耗民有銷錢為銅器故禁之

通考

孝武孝建初鑄四銖文曰孝建一邊為四銖其後稍去四銖專為孝建孝建則薤葉四銖則大篆其後稍去四銖專為孝建漸至薄小文字夷漫至明帝泰始三年罷

焉

舊譜

宋書前廢帝紀曰大明七年冬諸郡大旱米一升數百孝建已來又立錢署鑄錢百姓因此盜鑄轉偽小商貨不行永光元年春二年庚寅鑄二銖錢三月甲辰罷九

月戊午開百姓鑄錢

宋書顏竣傳曰前廢帝即位鑄二銖錢形或轉細官錢每出民間即模效之而大小厚薄皆不及也無輪郭不磨鑪如今之剪鑿者謂之耒子

顏竣傳曰世祖即位鑄孝建四銖

隋書食貨志曰梁武帝鑄五銖女錢二品並行百姓或私以古錢交易有直百五銖

顧烜曰天監元年鑄公式女錢徑一寸文曰五銖稱兩

如新鑄五銖但邊無輪郭未行用又聽民間私鑄以一萬二千易取上庫古錢一萬以此為率普通三年始興新鑄五銖並行用斷民間私鑄

十二月梁鑄錢梁初惟揚荆郢江湘梁益用錢交廣用金銀餘州雜以穀帛交易後鑄五銖錢而民間私用古錢禁不能止乃議鑄銅錢錢隋書食貨志

顧烜曰普通四年鑄大吉錢又鑄大通錢梁元帝時初鑄錢一當十賜僧垣十萬貫實百萬也

梁書敬帝紀曰太平二年夏鑄四銖錢一准二十壬辰改一准十丙申復開細錢

陳書宣帝紀曰宣帝大建十一年又鑄大貨六銖以一當五銖之十與五銖並行後還當一人皆不便乃相與訛言曰六銖錢有不利縣官之象未幾而帝崩遂廢六銖而行五銖竟至陳亡其嶺南諸州多以米布交易俱不用錢

食貨志

自孝文更造四銖錢至是四十餘年從建元以來用少

縣官往往多即銅山而鑄錢民亦盜鑄不可勝數錢益多而輕有司言今半兩錢法重四銖而姦或盜摩錢質而取鎔令縣官銷半兩錢更鑄三銖錢重如其文

食貨志

後魏食貨志曰孝莊永安二年秋詔改鑄文曰永安五銖官自立爐起自九月至三年正月而止官欲貴錢乃出藏絹分遣使人于二市賣之絹匹止錢二百而私市者猶三百利之所在盜鑄稱衆巧偽既多輕重非一四方州鎮用各不同楊侃傳曰時所用錢人多私鑄稍

就薄小乃至風飄水浮侃奏聽人與官並鑄使人樂為而俗弊得改旨下尚書八座不許後再奏孝莊從之乃鑄

北史西魏文帝大統六年二月鑄五銖錢十二年三月鑄五銖錢

後魏食貨志曰孝莊永安二年鑄永安五銖錢遷鄴之後輕濫尤多武定初齊文襄王奏革其弊于是詔遣使人詣諸州鎮收銅及錢悉更改鑄其文仍舊然姦僞之

徒越法趨利未幾之間漸復細薄六年文襄王以錢文五銖名須稱實當秤錢一文重五銖者聽入市百錢重一斤四兩自餘皆準此為數其京邑二市天下州鎮郡縣之市各置二秤懸於市間民所私用之秤皆準市秤以定輕重凡有私鑄悉不禁斷但五銖然後聽用若入市之錢重不五銖或雖五銖而多雜鉛錫並不聽用若有輒以小薄雜錢入有人糾獲其錢悉入告者其小薄之錢若即禁斷恐人交乏絕畿內五十日外州百日為

限羣官叅議咸以時穀頗貴請待有年王從之乃止

北齊神武霸政之初猶用永安五銖遷鄴已後百姓私鑄體制漸別遂各以為名有雍州青赤梁州生厚緊錢吉錢河陽生溫天柱赤牽之稱冀州之北錢皆不行交貿者皆以絹布神武乃收境內之銅及錢仍依舊文更鑄流之四境未幾之間漸復細薄姦偽競起

食貨志

後周之初尚用魏錢及武帝保定元年乃更鑄布泉之錢以一當五與五銖並行時梁益之境又雜用古錢交

易河西諸郡或用西域金銀之錢而官不禁建德三年又更鑄五行大布錢以一當十大收商賈之利與布泉錢並行四年又邊境之上人多盜鑄又禁五行大布不得出入四關布泉之錢聽入而不聽出五年以布泉漸賤而人不用遂廢之

隋食貨志

隋文帝開皇元年以天下錢貨輕重不一乃更鑄新錢背面肉好皆有周郭文曰五銖而重如其文每錢一千重四斤二兩是時錢既雜出百姓或私有鎔鑄三年四

月詔四面諸關各付百錢為樣從關外來勘樣相似然後得過樣不同者則壞以為銅入官詔行新錢以後前代舊錢有五行大布永通萬國及齊常平所在勿用以其貿易不止四年詔依舊不禁者縣令奪半年祿然百姓習用既久猶不能絕五年詔又嚴其制自是錢貨始一所在流布百姓便之是時見用之錢皆須和以錫鑞錫鑞既賤求利者多私鑄之錢不可禁約其年詔乃禁出錫鑞之處並不得私有採取十年詔晉王廣聽于揚

州立五鑪鑄錢其後姦猾稍多漸磨鑪錢郭取銅私鑄又雜以鉛錫遞相倣倣錢遂輕薄乃下惡錢之禁京師及諸州邸肆之上皆令立榜置樣為准不中樣者不入于市十八年詔漢王諒聽於并州立五鑪鑄錢又江南人間錢少晉王廣又請于鄂州白紵山有銅鑛處鑄錢于是詔聽置十鑪鑄錢又詔蜀王秀于益州立五鑪鑄錢是時錢益濫惡乃令有司檢天下邸肆見錢非官鑄者皆毀之其銅入官而京師以惡錢貿易為吏所執有

死者數年之間私鑄頗息大業以後王綱弛紊巨姦大猾遂多私鑄錢轉薄惡每千直重二斤後漸輕至一斤或剪鍤鏤裁皮糊紙以為錢相雜用之貨賤物貴以至

于亡

食貨志

北史齊文宣帝紀曰天保四年春正月己丑鑄新錢文曰常平五銖隋書食貨志曰文宣受禪除永安之錢改鑄常平五銖重如其文其錢甚貴且製造甚精

後周書宣帝紀曰大象元年十一月丁巳初鑄永通萬

國錢以一當十與五行大布並行

新唐書食貨志曰高祖初入關民間用綫環錢其製輕小凡八九萬纔滿半斛乃鑄開元通寶鄭虔會粹云詢初進蠟樣日文德皇后掐一甲跡故錢上有掐文每兩二十四銖則一錢重二銖半以下古秤比今秤三之一也則今錢為古秤之七銖以上古五銖則加重二銖以

上

新唐書
食貨志

顯慶五年以盜鑄惡錢多官為市之以一善錢售五惡

錢民間藏惡錢以待禁弛

唐史

新唐書食貨志曰乾封元年改鑄乾封泉寶錢以一當舊錢之十踰年而舊錢多廢明年以商賈不通米帛踊貴復行開元通寶錢二年正月詔乾封新鑄之錢令所司貯納更不須鑄

初唐憲宗令商賈至京師委錢諸道富家以輕裝趨四方合券乃取號曰飛錢太祖因其制許民入錢京師于諸道更換

宋史

元和四年京師用錢緡少二十及有鉛錫錢者捕之非
交易而錢行衢路者不問復詔采五嶺銀坑禁錢出嶺
六年貿易錢十緡以上者叅用布帛蔚州三河冶距飛
狐故監二十里而近河東節度使王鐸置鑪疏拒馬河
水鑄錢工費尤省以刺史李聽為使以五鑪鑄月鑄錢
三十萬自是河東錫錢皆廢自京師禁飛錢家有滯藏
物價頓輕判度支盧坦兵部尚書判戶部事王紹鹽鐵
使王播請許商人千戶部度支鹽錢三司飛錢每千緡

增給百錢然商人無至者復許與商人敵貫而易之然
錢重幣輕如故憲宗為之出內庫錢五十萬緡市布帛
每匹加舊估十之一會吳元濟王承宗連衡拒命以七
道兵討之經費屈竭皇甫鎛建議內外用錢每緡墊二
十外復抽五十送度支以贍軍

唐史

唐書食貨志曰肅宗乾元元年經費不給鑄錢使第五
琦鑄乾元重寶錢與開元通寶參用以一當十亦號乾
元十當錢元載肅宗實錄曰乾元九年秋七月鑄

金光襲曰乾元二年新鑄小錢一當一

唐書食貨志曰建中初戶部侍郎韓洄以商州紅崖冶銅多請復洛源廢監起十鑪鑄錢十萬二千緡每千錢費九百德宗從之江淮多鉛錫錢以銅盡外不盈斤兩帛價益貴銷千錢為銅六斤鑄器則斤得錢六百故銷鑄者多而錢益耗判度支趙贊採蓮州白銅鑄大錢一當千以權輕重

唐書食貨志曰武宗廢浮屠法永平監官李郁彥謂以

銅像鐘磬鑪鐸皆歸巡院州縣銅益多矣鹽鑲使以工有常力不足以加鑄許諸道皆得置錢坊淮南節度使李紳請天下以州名鑄錢京師為京錢大小徑寸如開元通寶

舊譜曰唐咸通十一年桂陽監鑄錢官王彤進新鑄錢文曰咸通玄寶尋有敕停廢不行

宋白續通典曰天成元年十二月敕中外所使銅錢內鍊鑲錢即宜毀棄不得行使二年八月禁銷銅錢四年

禁鑄鐵錢

宋白續通典曰晉天福三年十一月詔三京鄴都諸道州府無問公私應有銅者並許鑄錢仍以天福元寶為文左環讀之委鹽鐵司鑄樣頒下諸道

宋白續通典曰漢乾祐元年四月膳部郎中羅周裔上言請在京置錢監俾銅盡為錢以濟軍用

蘇耆開譚錄漢乾祐中以晉室鼓鑄錢幣偽濫非一乃禁銅貨悉歸公帑

周顯德二年帝以縣官久不鑄錢而民間多銷錢為器
皿及佛像錢益少乃立監採銅鑄錢自非縣官法物軍
器及寺觀鐘磬鈸鐸之類聽留外自餘民間銅器佛像
五十日內悉令輸官給其直過期隱匿不輸五斤以上
罪死不及者論刑有差其銅鏡官中鑄于東京置坊貨
賣許人戶收買興販朝廷及諸州見管法物軍器舊用
銅製及裝飾者候經使用破壞即仰改造不得更使銅
內有合使銅者奏取進止

五季
史

五代史周紀論曰世宗即位之明年廢天下佛寺三千三百三十六是時國中乏錢乃詔毀天下銅佛以鑄錢

太祖皇帝建隆二年禁諸鑄錢民間有者悉送官

宋史

太祖建隆六年將議改元語宰相勿用前世舊號于是改元乾德其後因于禁中見內人鏡背有乾德之號以問學士陶穀穀曰此偽蜀時年號也因問內人乃是故蜀王時人太祖繇是益重儒士而歎宰相之寡聞也

田歸

錄

乾德五年禁輕小惡錢限一月送官

先是許商人入錢左藏庫以諸州錢給之而商旅先經
三司投牒乃輸于庫所繇司計一緡私刻錢二十開寶
三年置便錢務令商人入錢者詣務陳牒即日輦致左
藏庫給以券仍敕諸州凡商人齎券至當日給付不得
住滯違者科罰自是毋復停滯至道末商人便錢一百
七十餘萬貫天禧末增一百二十三萬貫

宋史

宋初錢文曰宋元通寶太平興國後又鑄太平通寶錢

太宗親書淳化元寶作真行草三體自後每改元必更鑄以年號元寶為文

仁宗即位改元天聖時章獻明肅太后臨朝稱制議者謂撰號者取天字于文為二人以為二人聖者悅太后爾至九年改元明道又以為明字于文日月並也與二人旨同無何以犯契丹諱明年遽下作遂改曰景祐是時

連歲天下大旱改元詔意冀以迎和氣也五年因郊又改元曰寶元自景祐初羣臣慕唐玄宗以開元加尊號

遂請加景祐於尊號之上至寶元亦是歲趙元昊以河西叛改姓元氏朝廷惡之遽改元曰康定而不復加于尊號而好事者又曰康定乃謚爾明年又改曰慶厯至九年大旱河北猶甚民死者十八九于是又改元曰皇祐猶景祐也六年日蝕四月朔以謂正陽之月自古所忌又改元曰至和三年仁宗不豫久之康復又改元曰嘉祐自天聖至此凡年號九皆有謂也

歸田錄

國朝錢文皆用元寶而冠以年號及改號寶元文當曰

寶元元寶詔學士議因請改曰豐濟元寶仁宗特命以
皇宋通寶為文慶厯以後復冠以年號

宋斷新錢專用古錢

會編

高宗紹興元年因婺州之屯駐有司請椿辦合用錢而
舟楫不通錢重難致乃詔戶部造見錢關子付婺州召
客人入中執關赴權貨務請錢有願得茶鹽香貨鈔引
者聽于是州縣以關子充糴本未免抑配而權貨務又
止以日納三分之一償之人皆嗟怨

三年春正月鑄當十大錢自太祖以來諸路置監鑄錢有折二折三當五隨時立制未嘗鑄當十也至是蔡京將以利惑人主始請鑄于諸路與小平錢通行于時四年尚書省言東南諸路盜鑄當十錢者多乃詔廣南福建路更不行使當十錢有者兌換于別路行使其本路別鑄小平錢以閩廣係出銅處故也

又詔荆湖江浙當十錢並改作當五錢

六年二月詔置行在父子務臣僚言朝廷措置見錢關

子有司浸失本意改為交子官本無錢民何以信極論其不可于是罷交子務令權貨務所儲見錢印造關子二十九年印給公據關子赴三路總領所准西湖廣各關子八十萬緡淮東公據四十萬緡皆自十千至百十九五等內關子作三年行使公據二年許錢銀中半入納三十年戶部侍郎錢端禮被旨造會子儲見錢于城內外流轉其合發官錢並許兌會子赴左藏庫送納明年二月詔會子務隸都茶場正以客旅筭請茶鹽香礬等

歲以一千萬貫可以陰助稱提不獨恃見錢以為本又

非全仰會子以佐國用也三十二年十二月詔定偽造

會子之罰

犯人處斬賞錢一千貫如不願支賞與補進義校尉若徒中及窩藏之家能自告首時與

免罪亦支上件賞錢或願補前名目者聽

日造會子監官分押每一萬道解

赴戶部覆印當時會紙取于徽池州續造于成都府又

造於臨安府會子初止行于兩浙後又詔通行于淮浙

湖北京西除亭戶鹽本並用見錢外其不通水路去處

上供等錢許盡用會子解發其沿流州軍錢會中半民

間典賣田宅畜車船等如之或全用會子者聽

俱宋史

自太祖以來閩蜀陝西多用鑄錢每十文當銅錢一文至是河東轉運判官洪中孚言遼夏以鑄錢為兵器若雜以鉛錫則脆而不可用請改鑄之乃詔置陝西河東北京西十八監鑄當二夾錫鑄錢用之

紹興十五年置利州紹興監鑄錢十萬緡以救錢引地多山林宜炭鑄仍增鑄十五萬緡未行卒減鑄十萬二十二年嘉州守臣王知道乞復嘉之豐遠邛之惠民

二監鑄小錢

二十九年立為限制命官之家存留見錢二萬貫民庶半之餘限二年聽變轉金銀算請茶鹽香礬鈔引之類越數隱寄許人告

孝宗隆興元年詔鑄當二小平錢如紹興之初自乾淳迄嘉泰開禧皆如之

乾道六年并鑄錢司歸發運司七年復置八年于饒贛各置提點官

開寶五年禁民鑄錢為佛像浮屠及人物之無用者上

慮農民多毀農器以徼福故禁之俱會編

自大中祥符及崇寧以來錢皆精好高宗嘗諭近臣欲盡如舊制不較工料之費乾道八年孝宗以新鑄錢淆雜詔提點鑄錢及永平監官左藏西庫監官戶工部長貳議罰有差

熙寧末年旱詔議改元執政初擬大成神宗曰不可成字于文一人負戈繼又擬豐亨復曰不可亨字為子不

成惟豐字可用改元豐

石林燕語

大中祥符七年凌策又請鑄大錢以一當十嘉州豐遠監邛州惠民監置爐鼓鑄嘉熙四年趙抃乞罷十年以寬民力熙寧間轉運司復言罷累年民間見錢闕少乞減半鑄與交子相權詔從之

宋史

徽宗崇寧二年二月庚午初令陝西鑄折十銅錢並夾錫錢

寧宗嘉定元年即利州鑄當五大錢

嘉定三年春制總司收換九十一界二千九百餘萬緡其千二百萬緡以茶馬司羨餘錢及制司空名官告總所橈管金銀度牒對鑿餘以九十三界錢引收兌又造九十四界錢引五百餘萬緡以收前宣撫程松所增之數凡民間輸納者每引百帖八千其金銀品搭率用新引七分金銀三分其金銀品色官稱不無少虧每舊引百帖納二十引蓋自元年三年兩收舊引而引直遂復如故昔高宗因論四川交子最善沈該稱提之說謂官

中嘗有錢百萬緡如交子價減即官用錢自買方得無

弊

宋史

七年二月川陝副帥吳玠請置銀會于河北五月中書省言引數已多慮害成法詔止之蓋祖宗時蜀交書放兩界每界止一百二十餘萬令三界通行為三千七百八十餘萬以至於紹興末年積至四千一百四十七萬餘貫所有鑄錢僅及七十萬貫又以鹽酒等陰為稱提是以餉臣王之望亦請添印錢引以救目前不得不為

朝廷久遠之慮當時詔添印三百萬委之望約度給用即止後之望只添印一百萬

先是寧宗之世會子擁滯物價湧甚民不勝其苦朝廷無如之何至是更造金銀見錢關子以一准十八界會子三出奉宸庫珍貨收幣會子官廢十七界會子不用其關子之制上一黑印如西字中三紅印相連如目字下兩傍各一小長黑印宛然一賈字也銀關行物益貴李諮以實錢入粟實錢售茶二者不得相為輕重既行

而商人失厚利怨謗蠭起上疑變法之弊下詔責計置
司而遣官行視諮具言新法之便令孫奭等論其煩擾
遂罷其法官仍給本錢市茶商人入錢售之茶法復壞
解鹽亦復權之

宋史

廣惠食田本絕戶業以賑濟者也王安石請鬻之以為
河北東西陝西京東四路青苗本錢詔從之

俱同上

本朝歷凡十變在建隆則曰應天在太平興國則曰乾
元在咸平則曰議天在天聖曰崇天在治平曰明天在

熙寧曰奉天在元祐曰觀天在崇寧曰占天未幾又改

曰紀元在紹興曰統元

楓憲
小續

川陝舊皆行鑄錢祖宗時益利夔三州皆有鐵冶故即
山鑄錢邛州舊鑄歲十萬緡建炎初轉運判官靳博文
以為歲費本錢二十一萬得不償費乃罷之紹興十五
年鄭重為四川宣撫使始即利鑄錢歲十萬緡以救錢
引之弊率費二千而得千錢置官六人兵匠五百人歲
用鹽官錢七萬緡四路稱提錢十四萬緡為鑄本具後

增至十五萬二十三年嘉守王知道請復嘉邛鑄錢監
事下計司于是復置監于邛州明年詔州歲鑄三萬緡
利州九萬緡共費本錢引十七萬五千緡每千費本四
百二十五年又詔利州鑄大小錢各二萬凡大錢千重
十二斤小錢千重七斤有奇于是歲省鼓鑄所錢三萬
三十一年再減利州錢為六萬緡大小各半云施州舊
亦鑄錢萬緡南平軍數千緡紹興末皆減今蜀中歲鑄
錢十萬

淮上舊鑄銅錢兵火後舒州不復鑄錢但行饒建等錢而已乾道初林樞密安宅為右諫議大夫議以銅錢多入北境請禁之而即蜀中取錢行之淮上事既行洪景伯叅政言其不可上問之景伯曰今每州不得千緡一州以萬戶計之每家纔得數百恐民間無以貿易且客旅無回貨鹽場大有利害上以為然乃不行但于蜀中取十五萬緡行之盧和二州而已五年秋王公明使蜀復伸前議六年夏遂令司農寺丞許子中往淮西措

置卽舒蘄二州鑄夾錫錢舒州同安監歲二十五萬
緡蘄州蘄春監十五萬緡淳熙七年春舒守趙子濛
守施昱舒皆以鑄羨遷官然淮民大以爲擾八年秋王
謙仲知舒州入見爲上言之遂減舒州錢額十萬緡與
蘄州通爲三十萬後踰月又詔權罷鼓鑄一年二州既
復鑄錢因命淮西漕兼提舉江淮湖北錢冶鑄錢公事
歲增額至六十萬緡然淮錢日夥而又著令不許過江
人甚賤之乃復減爲四十萬

國朝初平江南歲鑄錢七萬貫自後稍增廣至天聖中歲鑄一百餘萬貫慶厯間至三百萬貫熙寧六年以後

歲鑄銅錢六百餘萬貫

夢溪筆談

冬十月女真初鑄銅錢先是止用前代舊錢也

金史

金以銅少循宋交子法造鈔引一貫二貫三貫五貫十貫五等謂之大鈔一百二百三百五百七百五等謂之小鈔與錢並用以七年為限納舊易新諸路置官庫受之每貫取工墨錢十五文公私便焉

女真造承安寶貨時銀每錠以五十兩其直百貫民間或有截鑿之者價隨以低昂遂改鑄銀名承安寶貨一兩至十兩分五等每兩折錢二貫公私同見錢用未幾寶貨多夾雜銅錫浸不能行乃罷之

二月女真造真祐通寶自百至三十等之為十凡一貫當寶券十貫聽各路轉運司印造與舊券參用而鈔愈

賤

同上

元行鈔法雖皆以錢為文而廢錢弗鑄至是始設大都

立資國院山東河東遼陽江淮湖廣四川立泉貨監六
產銅之地設提舉司十九鑄曰至大通寶者每一文准
銀鈔一釐曰大元通寶者准至大錢十文與歷代錢通
用其當五當三折二並以舊數用之既而御史言至大
銀鈔始行品目繁多民猶未悟而又兼行銅錢慮有相
妨今民間拘收銀器甚急民殊不便乞與省臣詳議不

報元
史

大秦國以金銀為錢十銀錢當一金錢

司馬彪續漢書

儀鳳四年以天下惡錢轉多令東都出遠年糙米及粟于市糶斗別納惡錢百文其惡錢令少府司農相訖即令鑄破其厚重合斤兩者任將行用

唐史

二十四年罷鑄錢司歸之漕司

宋史

前漢書食貨志曰王莽鑄大布次布第布壯布中布差布厚布幼布么布小布小布長寸五分重十五銖文曰小布直一百自小布以上各相長一分相重一銖文各為其布名直各加一百上至大布長二寸四分重一兩

而直千錢矣是為布貨十品

錢通卷四

欽定四庫全書

錢通卷五

明 胡我琨 撰

鑄辨

鄭衆曰錢始一品景王鑄大錢而有二品後數變易不失本制唐固所謂大泉乃王莽時錢非景王所鑄明矣又景王至赧王十三世而周亡後有戰國秦漢幣物改轉不相因先師所不能紀或云大錢文曰寶貨皆非事

實舊志

桓公令左司馬伯公將白徒鑄錢於莊山令中大夫王

邑載錢二千萬求生鹿於楚

管子

馬殷始鑄鉛錢行於城中城外即用銅錢賈人多銷鉛錢持過江北高郁請鑄鐵錢圍六寸文曰乾封泉寶以一當十錢既重厚市肆以券契指契交易

楚史

今世有一樣古錢其文曰半兩無輪郭醫方中用以為藥考之史記乃漢文帝時錢也當時吳淠鄧通皆得自

鑄錢獨多流傳至今不絕其輕重適中與今錢畧相似
視五銖貨泉又先一二百年矣五銖貨泉比今錢却稍

輕

鶴林
玉露

景帝中六年定鑄錢偽黃金棄市律人有告鄧通盜出

徼外鑄錢下吏驗問頗有遂竟案盡沒之

漢史

漢孝武自造白金五銖錢後吏民坐盜鑄金錢死者數十
十萬人犯者益衆吏不能盡誅詔遣博士六人分巡郡

國舉兼并之徒及守相為吏有罪者

通鑑

廢帝景和二年鑄二銖錢文曰景和形式轉細官錢每
出入人間即模效之而大小厚薄皆不及也無輪郭不
磨剪鑿者謂之未子猶薄輕者謂之荇葉市井通用之
永光元年沈慶之啟通私鑄由是錢貨亂改一千錢長
不盈三寸大小稱此謂之鵝眼錢劣於此者謂之綆環
錢入水不沈隨手破碎市井不復料數十萬錢不盈一
掬斗米一萬商賈不行南史

西魏大統七年正月東魏有雀銜永安錢置渤海王高

歡前歡世子澄乃令百爐別鑄此錢鄴中號令公百爐

錢

丘悅三
國典略

泰始中建德校尉王和掘得一鼎容四斗中有大錢三

十文曰百當千千當萬因此令公私行錢

晉書載記
石勒傳

魏行太和五銖錢通鑑曰先是魏人未嘗用錢魏主始

命鑄之是歲鼓鑄初備詔公卿私用之劉氏曰魏始用

錢也終魏之世再鑄皆五銖錢可謂得輕重之中矣

會編

元帝過江用孫氏舊錢輕重雜行大者謂之比輪中者

謂之四文吳興沈充又鑄小錢謂之沈錢

文宣受東魏禪除永安之錢改鑄常平五銖重如其文其錢甚貴而製造甚精其錢未行而私鑄已興一二年間即有濫惡雖殺戮不能止乃令市增長銅價繇此利薄私鑄少止至乾明皇建之間徃徃私鑄鄴中用錢有赤郭青熟細眉赤生之異河南所用有青薄鉛錫之別青齊徐兗梁荆河等州輩類各殊武平以後私鑄轉甚或以生鐵和銅至於齊亡卒不能禁

隋志

梁武帝廼鑄錢肉好周郭文曰五銖重四銖三系一黍其文則重一斤三兩又別鑄除其肉郭謂之公式女錢徑一寸文曰五銖重如新鑄五銖二品並行百姓或私以古錢交易者其五銖徑一寸一分重八銖文曰五銖三吳屬縣行之女錢徑一寸重五銖無輪郭郡縣皆通用太平百錢二種並徑一寸重四銖源流本一但文字古今之殊耳文並曰太平百錢定平一百五銖徑六分重一銖半文曰定平一稚錢五銖徑一分半重四銖文

曰五銖源出於五銖但狹小東境謂之稚錢五銖錢徑七分半重三銖半文曰五朱源出稚錢但稍遷異以銖為朱耳三吳行之差少於餘錢又有對文錢其源未聞豐貨錢徑一寸重四銖半代俗謂之男錢云婦人佩之即生男也此等輕重不一天子頻下詔書非新鑄二種之錢並不許用而趨利之徒私用轉甚至普通中廼議盡罷銅錢更鑄鑌錢人以鑌錢易得並皆私鑄及大同以後所在鑌錢遂如丘山物價騰貴交易者以車載錢

不復計數而惟論貫商旅姦詐因之以求利自破嶺以東八十為陌名曰東錢江郢以上七十為陌名曰西錢京師以九十為陌名曰長錢大同元年天子廼詔通用足陌詔下而人不從錢陌益多至於末年遂以三十五為陌

六朝史

復行開通元寶錢天下皆鑄之然私錢犯法日蕃有以舟筏鑄江中者詔所在納惡錢而姦亦不息儀鳳中瀕江民多私鑄錢為業詔巡江官督捕載銅錫蠟過百斤

者沒官乃詔少府鑄尋復舊永淳元年私鑄者抵死隣保從坐

景龍中中宗出降睿宗女荊山公主特鑄撒帳錢用以撒帳敕近臣及修文館學士拾錢其銀錢則散貯絹中金錢每十文即繫一絲條學士皆作却扇詩其最近御坐者所獲居多有學士考功員外武平一既出逢韋巨源蘇味道各執平一將在燭下云員外外僕射省主欲有何取以手探平一懷盡而後已

舊譜

初有虛錢京師人人私鑄并小錢壞鐘像犯禁者愈衆
鄭叔清為京兆尹數月榜死者八百餘人上元元年減
重輪錢以一當三十開元舊錢與乾元十當錢皆以一
當十礪磴鬻受得為實錢虛錢交易皆用十當錢繇是
錢有虛實之名

斬春鑄錢監五月至七月號為鑄凍例閤鑪鞬本錢四
可鑄十鐵炭稍貴六可鑄十工雇費皆在焉其用工之
序有三曰沙模作次曰磨錢作末曰排整作以一監約

之日役三百人十日可鑄一萬緡一歲用工九月可得

二十七萬緡

游宦紀聞

僕嘗怪開元錢流傳至今四五百年而於諸錢之中最佳且多因而考之唐之錢見於今者有二開元通寶與夫乾元重寶按食貨志開元通寶高祖時鑄徑八分得輕重大小之中其文以八分篆隸三體洛并幽並桂等州皆置監賜秦王齊王三壚右僕射裴寂一壚高宗復行開元通寶錢天下皆鑄之玄宗亦鑄此錢庫藏滿行徧

天下而乾元重寶錢肅宗命第五琦鑄錢徑一寸每緡重十斤與開元通寶參用以一當十琦為相後命絳州鑄此錢徑一寸二分每緡重二十斤與開元通寶並行以一當十乾元錢惟肅宗朝鑄而開元錢鑄於累朝所以至今尚多

野客叢書

今唐國通寶大唐通寶乃南唐錢或者不知求之三年之唐謬也按南唐書元帝即位鑄唐國通寶大唐通寶通用數年漸弊百姓盜鑄極為輕小元宗即璟

同上

武后長安中令懸樣於市令百姓依樣用錢俄而揀擇艱難交易留滯乃令錢非穿穴及鐵錫銅液皆得用之熟銅排斗沙澀之錢皆售自是盜鑄蜂起江淮尤甚莫能捕光天之際兩京錢益濫邠衡錢纔有輪郭錢錫五銖之屬皆可用之或鎔錫模錢須臾千百

會編

時兩京用錢稍善米粟價益下其後錢又漸惡詔出銅所在置監鑄開元通寶錢京師庫藏皆滿天下盜鑄益起廣陵丹陽宜城猶甚京師權豪歲歲取之舟車相屬

江淮偏鑪錢數十種雜以鐵錫輕漫無復錢形以一當偏鑪錢七八富商往往藏之以易江淮私鑄者兩京錢有鶩眼古文綫環之別每貫重三四斤至剪鐵而緡之宰相李林甫請出絹布三百萬匹平估收錢物價踴貴訖者百萬人兵部侍郎楊國忠欲招權以市恩揚鞭市門曰行當復之明日詔復行舊錢天寶十一載又出錢三十萬緡易兩京惡錢出左藏排斗錢許民易之國忠又言非鐵錫銅沙穿穴古文皆得用之是時增調農人

鑄錢既非所習皆不聊生內作判官韋倫請厚價募工
繇是役用減而鼓鑄多天下鑪九十九絳州三十揚潤
宣鄂蔚皆十益郴皆五洋州三定州一每鑪歲鑄錢三
千三百緡役丁匠三十費銅二萬一千二百斤鑪三千
七百斤錫五百斤每千錢則費錢七百五十天下歲鑄
三十二萬七千緡

太和三年詔佛像以鉛錫土木為之飾帶以金銀鍮石
烏油藍鍊唯鑑磬釘鐶鈕得用銅餘皆禁之盜鑄者死

是時峻鉛錫錢之禁告千錢者賞以五十四年詔積錢以七千緡為率十萬緡者期以一年出之二十萬以二年凡交易百緡以上者匹帛米粟居半河南府揚州江陵府以都會之劇約束如京師未幾皆罷八年河東錫錢復起鹽鐵使王涯置飛狐鑄錢院於蔚州天下歲鑄錢不及十萬緡

唐主李璟既失江北困於用兵鍾謨請鑄大錢以一當十文曰永通泉貨謨得罪而大錢廢韓熙載又鑄鐵錢

以一當二錢有銅錢二等五代相承用唐錢諸國割據者江南曰唐國通寶又別鑄如唐制而篆文其後鑄鐵錢每十錢以鐵錢六權銅錢四而行乾德後只以鐵錢貿易凡十當銅錢一兩浙河東自鑄銅錢亦如唐制西川湖南福建皆用鐵錢與銅錢兼行湖南文曰乾封泉寶徑寸以一當十福建如唐制

二十八年上命御府銅器千五百事付泉司大索民間銅器告者有賞其後得銅二百餘萬斤寺觀鐘磬鐃鈸

既籍定投務外不得添鑄

寶歷初河南尹王起請銷錢為佛像者以盜鑄錢論

唐史

禁私賣銅鉛錫敕以人間多盜鑄錢始禁私賣銅鉛錫
及以銅為器其采銅鉛錫者官為市取

同上

唐李德為蔚州刺史州有銅冶自天寶後廢不治民盜
鑄不禁德乃開五鑪官鑄錢日五萬人無犯者

初陝西運興移用不足知商州皮仲容始獻議采洛南
縣紅崖山號州青水冶青銅置阜民朱陽二監以鑄錢

既而陝西都運使張奎知永興軍范雍請鑄大錢與小錢兼行大錢一當小錢十及奎徙河東又鑄大鐵錢亦以一當十以助關中軍費未幾三月奏罷河東鑄錢此陝西復采儀州竹共黃銅置傳濟監鑄大錢朝廷因令江南鑄大銅錢而江池號饒州入鑄小錢錢悉輦致關中數州錢雜行大約小銅錢三十鑄當十大銅錢一以民間盜鑄者衆錢文大亂物價翔踊公私患之於是奎復奏晉澤石三州及威軍日鑄小錢錢獨留用河東

而河東鑄錢既行盜鑄錢者獲利十之六錢輕貨重其
患如陝西言者皆以為不便知并州鄭戩請河東鑄錢
且以一當銅錢一行一年又以三當一或以五當一
自晉以東厥錢用青金自河以北厥錢用黑金是殊異
之禁不行矣

牛僧孺策

石琚字子美世宗嘗與宰臣議鑄錢或以工費數倍欲
采金銀坑冶上曰山澤之利可以與民惟錢幣不當私
鑄若財貨流布四方與在官何異琚進曰臣聞天子之

富藏於天下正如泉源欲其流通耳上問琚曰古亦有百姓鑄錢者乎對曰使百姓自鑄則小人圖厚利錢愈薄惡古所以禁也

五代史

寰宇記云廣陵監丹陽監每歲鹽鍊使鐵錢萬一千餘貫二監並置在建安軍永鎮縣郭內

揚州府志勝

時長安鑄錢多姦巧乃署第五倫為督鑄錢掾領長安

市倫平銓衡正斗斛士無阿枉百姓悅服

第五倫傳

武宗廢浮圖法永平監官李郁彥請以銅像鐘磬鑪鐸

皆歸巡院州縣銅亦多矣鹽鐵使以工有常力不足以
加鑄許諸道觀察使皆得置錢坊淮南節度使李紳請
天下以州名鑄錢京師為京錢大小徑寸如開元通寶
交易禁用舊錢會宣宗即位盡黜會昌之政新錢以字
可辨復鑄為像昭宗末京師用錢八百五十為貫每百
纔八十五河南府以八十為百云

唐史

凡鑄銅錢有四監饒州曰永平池州曰永豐江州曰廣
寧建州曰豐國每千文用銅三斤十兩鉛一斤八兩錫

八兩成重五斤惟建州增銅五兩減鉛如其數至道中
歲鑄八十萬貫景德中至一百八十三萬貫大中祥符
後銅坑多不發天禧末鑄一百五萬貫鐵錢有三監
州有惠民嘉州有豐遠興州有濟衆大錢貫重十二斤

兩以准銅錢

舊皆用小鐵錢十當銅錢之一景德二年
令知益州張詠西川轉運使黃觀同裁度

嘉邛二州所鑄大鐵錢每貫用二十五斤八兩成直銅
錢一小鐵錢十相兼行用後以鐵重多盜竊為器每二
十五斤當之直二千大中祥符七年知益州凌策言錢
輕則行者易齎錢小則鎔者鮮利請減景德二年之制
其見使舊行亦令歲總鑄二十一萬餘貫
仍舊行用從之

凡鑄銅錢用劑八十八兩得錢千重八十兩十分其劑
銅居六分鉛錫俱三分皆有奇贏鑄大鐵錢用鐵二百
四十兩得錢千重百九十二兩此其大法也有許申者
為三司度支判官建議以藥化鐵與銅雜鑄輕重如銅
錢法而銅居三分鐵居六分皆有奇贏亦得錢十費省
而利厚詔鑄於京師然鑄錢雜鉛錫則其液流速而易
成中雜以鍤鍤溢而多不就工人苦之後卒無成

諸路鑄錢總二十六監每年鑄銅鐵錢五百四十九萬

九千二百三十四貫內銅錢十七監鑄錢五百六萬貫

鐵錢九監鑄錢八十八萬九千二百三十四貫

銅錢逐監錢數阜財監

兩京

二十萬貫黎陽監

衛州

二十萬

貫永興軍華州陝府錢監各鑄二十萬貫計六十萬貫

垣曲監

絳州

二十六萬貫永安監

舒州

一十萬貫神泉監

睦州

一十萬貫富民監

吳國軍

二萬貫熙寧監

衛州

二十萬貫寶

泉監

鄂州

一十萬貫廣寧監

江州

三十四萬貫永豐監

池州

四

十四萬五千貫永平監

饒州

六十一萬五千貫豐國監

建州

二十萬貫永通監韶州八十萬貫阜民監惠州七十萬貫

鑄錢逐監錢數在城朱陽兩監號州各十二萬五千貫阜

民洛南兩監高州各十二萬五千貫威遠鎮通遠軍滔山鎮

岷州兩監共二十五萬貫嘉州二萬五千貫邛州七萬三

千二百三十四貫興州四萬一千貫衍義補

尚書省言崇寧監鑄御書當十錢每貫重一十四斤七

兩用銅九斤七兩二錢鉛四斤一十二兩六錢錫一斤

九兩二錢除火耗一斤五兩每錢重三錢

洪遵曰余按顧烜錢譜金光襲錢寶錄李孝美錢譜以大泉寶貨兩存之董道錢譜始去大泉余謂此錢當以班史為正董說得之矣

錢志

余按班馬二史皆云英錢不載錢文顧烜之說蓋近之矣金光襲董道皆因之李孝美以為楷書文曰漢興英錢自科斗之法熄而篆隸行至東漢末始變為楷何其說之妄耶

張台曰五銖錢品數最多有薄形者名蜀錢肉好有郭

者名梁錢背文四出者名角錢及有赤側當兩女錢之類文皆五銖又於此外有穿上一星至五星穿下一星穿上下各一星漫面穿傍一星至三星五字之內上下各一星背上或有小字或有王字穿上橫文穿下橫文穿面四角決文穿背四角決文有郭無郭濶緣細緣不可窮盡

劉巴說先主鑄直百錢傳形五銖此又近之未知孰是張台曰今自巴蜀至於襄漢此錢甚多皆是昭烈舊

地斷在不疑李孝美曰皇朝宗正少卿趙安易使蜀以蜀用鐵錢甚賤物價益貴因上言請如昭烈時鑄大錢當百同上

洪遵曰余按東西魏皆鑄永安五銖故存於今甚多其品有三面文獨曰永安五銖者幕文土字者背文四出者

唐書食貨志曰第五琦為相復命絳州諸鑪鑄重輪乾元錢與開元通寶錢並行以一當五十肅宗以新錢不

便上元元年減重輪錢以一當三十開元舊錢與乾元
十當錢皆以一當十代宗即位乾元重寶錢以一當三
重輪錢以一當三凡三日而大小錢皆以一當一自第
五琦更鑄犯法者日數白州縣不能禁止至是人甚便
之唐肅宗實錄曰乾元二年九月戊辰新鑄大錢其文
依乾元重寶而重其輪以別之一當五十

大厯錢史氏不叙鑄作之因切考代宗實錄云大厯四
年正月丁酉關內道鑄錢等使第五琦上言請于絳州

汾陽銅源兩監增置五爐鑄錢許之豈非當時鑄此耶
洪遵曰余按此錢銅質渾厚字文明坦質之史氏無改
鑄大錢之文以意推之唐食貨志云建中初判度支趙
贊採連州白銅鑄大錢一當十以權輕重安知斯錢非
當時所鑄耶

舊譜曰武宗會昌年鑄時初廢天下佛寺宰相李德裕
奏請以廢寺銅鐘佛像僧尼瓶碗等所在本道鑄錢揚
州節度使李紳乃於新錢背加昌字以表年號而進之

有敕遂敕鑄錢之所各以本州郡名為背文于是京兆
府以京字右穿上洛陽以洛字在穿上揚州改以揚字
在穿上西川以益字在穿上藍田縣以藍字在穿右襄
州以襄字在穿上江陵府以荆字在穿右越州以越字
在穿下宣州以宣字在穿左江西以洪字在穿上湖南
以潭字在穿左兗州以兗字在穿上浙西以潤字在穿
上鄂州以鄂字在穿上平州以平字在穿上興元府以
興字在穿上梁州以梁字在穿右廣州以廣字在穿右

東川以梓字在穿上福州以福字在穿上丹州以丹字
在穿上桂陽監以桂字在穿右李孝美曰此錢背文
復有襄字或在穿右梁字或在穿上者但揚字錢終莫
之見疑當時已行昌字而未嘗改耳

俱同上

荀悅漢紀曰居攝二年夏四月更造錯刀一直五千與
五銖並行

余按五銖沿漢迄隋因革不一品目尤夥文四出謂之
角錢去肉郭謂之女錢狹小其制謂之稚錢三面無郭

謂之白錢有反其文名傳形者有輪郭去盡名對文者有上下其字名奇品者以至赤側當兩鶩眼雞目四柱兩柱之類

隋書食貨志曰梁武帝鑄五銖錢又別鑄除其肉郭謂之女錢二品並行百姓或私以古錢交易有五銖女錢太平百錢五銖稚錢五銖對文等號輕重不一天子頻下詔書非新鑄二種之錢並不許用

荀悅漢紀曰居攝二年夏四月更造契刀一直五百與

五銖並行

課額

漢律人出一等筭百二十錢惟賈人與奴婢倍筭

漢儀注

置鹽鐵官筭緡錢舟車通鑑曰於是以齊大煮鹽東郭咸陽大冶孔瑾為太農丞領鹽鐵事洛陽賈人子桑弘羊以心計年十三侍中三人言利事析秋毫矣詔禁民敢私鑄鐵器煮鹽者鈇左趾沒入其器物又令諸賈人末作各以其物自占率緡錢二千而一筭及民有船車

者皆有筭匿不自占占不悉戍邊一歲没入緡錢有能

告者以其半畀之其法大抵出張湯

漢孝武帝

遣使治郡國緡錢殺右內史義縱通鑑曰上既下緡令
錢而尊卜式百姓終莫分財佐縣官於是楊可告緡錢
縱矣可告緡徧天下中家之上大抵皆遇告杜周治之
少反者分遣御史廷尉正監即治郡國緡錢得民財物
奴婢以億萬計田宅亦如之於是商賈中家之上皆破
民媮食好衣不事畜業內史義縱以為此亂民部吏捕

其為可使者上以縱為廢格沮事棄縱市杜周南陽杜

衍人

同上

元平元年春二月減口賦錢什三口賦錢民年七歲至十四出口賦人二十三錢二十錢以食天子其三錢者

武帝加口賦以補車騎馬

漢儀注

宣帝五鳳二年令郡國毋歛今年馬口錢

經濟編

東都民有犯私麴者留守孔循族之或謂聽民造麴而

於秋稅畝收五錢從之

會編

齊主初立厲精為治詔僕射薛琠取魏麟趾格討論損益以為齊律簡練六坊之人每一人必當百人任其臨陣必死然後取之謂之百保鮮卑又簡華人勇力者謂之勇士以備邊要始立九等之戶富者稅其錢貧者役其力

通鑑

圖經云在句容縣西南三十里源出絳巖山周回二十里溉田一百頃舊收歲課錢二百二十貫咸平三年正月奉敕除放

六朝事迹

唐武德七年移新州却復舊址升為望管縣七鄉一百

九十四戶十四萬三

本作二

千二

當作三

百六十一雜稅茶

鹽酒等錢六十九萬二千八百八十五貫七十六文

吳縣九萬九千九百六十三貫七十三

本作三字

文

長州

縣九萬八千五百七十六貫五百七十六文 嘉興縣

一十七萬八千七十六貫一百二十文 崑山縣一十

萬九千五百三貫七百三十八文 常熟縣九萬七百

五十貫七百七十四

本無四字

文

華亭縣七萬二千一百

八十二貫四百三十一文 海鹽縣四萬六千五百八

十一貫五十八文 續添吳江縣三萬六千二百六十

九貫一百文使司割隸督菜錢一十萬七千七百二十

貫二百四四作十六八作文 留蘇州軍事督菜衣糧等錢

一十七萬八千三百四十九貫九十八文當作九百二文團練

使軍資等三十本無十字萬六當作七千八百三十貫文送納

本無上都吳地
納字

兩浙身丁錢者始未行鈔法以前歲計丁口官散糴鹽

每丁給鹽一斗輸錢百六十有六謂之丁鹽錢自鈔法既行之後鹽盡通商而民無所給每丁仍增錢為三百

六十謂之身丁錢

宋戶口

建炎三年詔以一半折絹一半納見錢於是歲為絹二十四萬匹綿百萬兩錢二十萬緡紹興初又用嚴守顏為言曾得解人免丁錢二十五年上念浙民之困免丁

絹錢綿一年以內府錢帛償戶部

同上

祥符中張詠知益州患蜀人鐵錢重不便貿易設質劑

之法一交一緡以三年為一界而換之六十五年為二十
十二界謂之交子使富民十六戶主之後富民稍衰不
能償所負爭訟不息轉運使薛田張若谷請置交子務
以權其出入禁私造者帝從其議立務於益州界以百
二十五萬六千三百緡為額

宋史

國朝茶利除官本及雜費外淨入錢禁權時取一年最
中數計一百九萬四千九十三貫八百八十五內六十
四萬九千六十九貫茶淨利

賣茶嘉祐二年收十六萬
四百三十一貫五百二十

七除官本及雜費外得淨利五十四萬四千四百五十二

十四貫六百七十茶稅錢最中嘉祐元年所收數除川茶錢在外通商後

來取一年最中數計一百一十七萬五千一百四貫九

百一十九錢內三十六萬九千七十二貫四百七十一

錢茶租嘉祐四年通商直定茶交引錢六十八萬四千三百二十一貫三百八十後累經減放至治平

二年最中分收上數八十萬六千三十二貫六百四十八錢茶稅

最中治平三年除川茶稅錢外會此數夢溪筆談

淳化四年初行交引罷貼射法西北入粟給交引自通

利軍始是歲罷諸處權貨務尋復依舊至咸平元年茶利錢以一百三十九萬二千一百一十九貫為額

景德二年許人入中錢帛金銀謂之三稅至祥符九年茶引益輕用知秦州曹瑋議就永興鳳翔以官錢收買客引以捄引價前此累增加饒錢至天祐二年鎮戎軍納大麥一斗本價通加饒共支錢一貫二百五十四乾興元年改三分法支茶引三分東南見錢二分半香藥四分半天聖元年復行貼射法行之三年茶利盡歸大

商官場但得黃晚惡茶乃詔孫奭重議罷貼射法三部副使各罰銅二十斤

自貼射茶法廢而河北入中虛估之弊益甚李諂既居相府請復行見錢法乃訪利害於商人遂罷入中虛估以實錢償芻粟實售官茶皆如天聖元年之製又命商持券徑趨權貨務驗實立償之錢而三稅之法廢縣官自此省費矣

通鑑

權茶之法擇要地置權貨務會給交鈔往還而不積茶

貨其淮南斬黃廬舒光壽六州官自為場置吏謂之山
場凡十三所六州采茶之民皆隸焉謂之園戶陝西河
北商人入芻糧者權貨務給券以茶償之又並以東南
緡錢及香藥犀象為虛實三估謂之三稅至用十四錢
易官錢百其法屢更不能無弊上命詔等校歲入登耗
更定之詔等言淮南十三場茶歲課五十萬緡天禧五
年纔及二十三萬緡每券直錢十萬鬻之售錢五萬五
千總為實錢十三萬緡除九萬緡為本錢歲纔得息二

萬餘緡而官吏廩給雜貨不與焉是則虛數雖多實利殊寡請罷三稅以十三場本息併計其數罷官給本錢使商人與園戶自相交易一切定為中估而官收其息如鬻部舒州羅源場茶斤售錢五十有六官不復給但使商人輸息錢三十有一而已然輦茶入官隨商人所指而與之給券為驗以防和售謂之貼射若歲課貼射不盡則官市之如舊商人入芻糧塞下者隨所在實估度地里遠近量增其直給券至京一以緡錢償之謂之

見錢法詔等又以鹽之類有二解池引水而成曰顆鹽
淮浙蜀廣鶩海或井或鹹而成曰末鹽皆通商貿易乾
興初解鹽計歲入二十三萬緡視天禧中數損十四萬
請罷之專令兩池入中並邊芻粟上皆從之

國朝六榷貨務十三山場都賣茶歲一千五十三萬三
千七百四十七斤半租額錢二百二十五萬四千四十
七貫一十其六榷貨務取最中嘉祐六年拋占茶五百
七十三萬六千七百八十六斤半租額錢一百九十六

萬四千六百四十七貫二百七十八荆南府租額錢三十一萬五千一百四十八貫三百七十五受納潭鼎澧岳歸峽州荆南府片散茶共八十七萬五千三百五十七斤漢陽軍租額錢二十一萬八千三百二十一貫五十一受納鄂州片茶二十三萬八千三百斤半蘄州蘄口租額錢三十五萬九千八百三十九貫八百一十四受納潭建州興國軍片茶五十萬斤無為軍租額錢三十四萬八千六百二十貫四百三十受納潭筠袁池饒

建歙江洪州南康興國軍片散茶共八十四萬二千三百三十三斤真州租額錢五十一萬四千二十二貫九百三十二受納潭袁池饒歙建撫筠宣江吉洪州興國臨江南康軍片散茶共二百八十五萬六千二百六斤海州租額錢三十萬八千七百三貫六百七十六受納睦湖杭越衢溫婺台常明饒歙州片散茶共四十二萬四千五百九十斤十三山場租額錢共二十八萬九千三百九十九貫七百三十二共買茶四百七十九萬六

千九百六十一斤光州光山場買茶三十萬七千二百
十六斤賣錢一萬二千四百五十六貫子安場買茶二
十二萬八千二十斤賣錢一萬三千六百八十九貫三
百四十八商城場買茶四十萬五百五十三斤賣錢二
萬七千七十九貫四百四十六壽州麻步場買茶三十
三萬一千八百三十三斤賣錢二萬四千八百一十一
貫三百五十霍山場買茶五十三萬二千三百九斤賣
錢三萬五千五百九十五貫四百八十九開順場買茶

二十六萬九千七十七斤賣錢一萬七千一百三十貫
廬州王同場買茶二十九萬七千三百二十八斤賣錢
一萬四千三百五十七貫六百四十二黃州麻城場買
茶二十八萬四千二百七十四斤賣錢一萬二千五百
四十貫舒州羅源場買茶一十八萬五千八十二斤賣
錢一萬四百六十九貫七百八十五太湖場買茶八十
二萬九千三十二斤賣錢三萬六千九十六貫六百八
十蘄州洗馬場買茶四十萬斤賣錢二萬六千三百六

十貫王棋場買茶一十八萬二千二百二十七斤賣錢
一萬一千九百五十三貫九百九十二石橋場買茶五
十五萬斤賣錢三萬六千八十貫

夢溪筆談

紹興間歲支鹽三十餘萬席為錢六七百萬

吳陵志

初蜀中財賦入戶部三司者五百餘萬緡入四總領所
者二千五百餘萬緡金銀綾錦之類不預焉自寶慶三
年失關外端平三年蜀地破所存州郡無幾國用益

窘

宋史

秋七月稅青苗錢給百官俸唐租庸調之法壞代宗以
畝定稅歛以夏秋時又以國用急不及秋苗方青卽征

之號青苗錢

鑑通

五月增商稅為什一以軍興故也譏重歛也於是以軍

興增及商稅越明年而田稅錢亦增矣

會編

五月詔增稅錢淮南節度使陳少遊奏本道稅錢每千
請增二百詔他道皆增稅錢視此又詔鹽每斗價皆增

百錢

鑑通

初行稅間架除陌錢法時河東澤潞河陽朔方四軍屯魏縣神策永平宣武淮南浙西荆南江西沔鄂湖南黔中劔南嶺南諸軍環淮寧之境舊制諸道軍出境則仰給度支上優恤士卒每出境加給酒肉本道糧仍給其家一人兼三人之給故將士利之各出軍纔逾境而止月費錢百三十餘萬緡常賦不能供判度支趙贊乃奏行二法所謂稅間架者每屋二架為間上屋稅錢二千中稅千下稅五百敢匿一間杖六十賞告者錢五十緡

所謂除陌錢者公私給與及賣買每緡官留五十錢給他物及相貿易者約錢為率敢隱錢者百杖六十罰錢二千賞告者錢十緡賞錢皆出坐者於是愁怨之聲盈

於遠近

會編

王播奏約榷茶額每百錢加稅五十李珣等諫曰榷茶近起貞元多事之際今天下無虞所宜寬橫歛之目而更增之百姓何時當得息肩不從

唐徵諸郡丁口鹽錢丘氏濬曰後世徵戶口食鹽錢自

此始

自元昊反軍興用度不足因聽並邊入中芻粟予券趨京師權貨務受錢若金銀入中他貨予券償以池鹽由是羽毛筋角膠漆鐵炭瓦木之類一切以鹽易之猾商貪吏表裏為姦至入椽木二估錢千給鹽二百二十斤鹽直益賤販者不行至是詔凡商人虛估受券及已受鹽未粥者皆計直輸虧官錢內地州軍民間鹽悉收市入官官為置場增價出之復禁永興等十一州軍商鹽

官自輦運以衙前主之又禁商鹽私入蜀置折博務於永興鳳翔聽人入錢若蜀貨易鹽趨蜀中以售已而東南末鹽悉復禁權

會編

條例司上言民間多願借貸青苗錢乞遍下諸路轉運司施行仍詔諸路各置提舉二員管當一員掌行青苗免役農田水利諸路凡四十一人提舉官既置往往迎合王安石意務以多散為功富民不願取貧者乃欲得之即令隨戶等高下召配又令貧富相兼十人為保首

王廣淵在京東一等戶給十五千等而下之至五等猶給一千民間喧然以為不便廣淵入奏謂民皆歡呼感德諫官李常御史程顥論廣淵抑配掊克迎朝廷旨意以困百姓會河北轉運使劉庠不散青苗錢奏適至安石曰廣淵力主新法而遭劾劉庠欲壞新法而不問舉事如此安得人無向背繇是常顥之言皆不行

時免役出錢或未均呂惠卿用其弟曲陽縣尉和卿計創手實法其法官為定立物價使民各以田畝屋宅資

貨畜產隨價自占凡居錢五當蓄息之錢一非用器食粟而輒隱落者許告有實以三分之一充賞預具式示民令依式為狀縣受而籍之以其價列定高下分為五等既該見一縣之民物產錢數乃參會通縣役錢本額而定所當輸錢詔從其言於是民家尺椽寸土檢括無遺至於雞豚亦編抄之民不聊生初惠卿制是法然猶災傷五分以上不預荆湖察訪使蒲宗孟上言此天下之良法使民自供初無所擾何待豐歲願詔有司勿以

豐凶弛張其法從之民於是益困矣

俱同上

初胥吏杜公才獻策於內侍太傅楊戩立法索民田契自甲之乙乙之丙展轉究尋至無可證則度地所出增之賦租始於汝州浸淫於京東西淮西北括廢堤棄堰荒山退灘皆勒民主佃額一定後雖充蕩回復不可減一邑率於常賦外增租錢至十餘萬緡水旱蠲稅此不得免擢公才為觀察使至是戩死以內侍李彥繼之彥狠愎密與王黼表裏置局汝州臨事愈劇凡民間美田

使他人投牒告陳皆指為天荒雖執印券皆不省魯山
闔縣盡括為公田訴者輒加威刑致死者千萬京西提
舉官及京東州縣吏皆助彥為虐民不勝忿痛發物供
奉大抵類朱勔責辦於民無休息期農不得之田牛不
得耕墾殫財靡芻力竭餓死或自縊輾輒間如龍麟薜
荔一本輦致之費踰百萬喜賞怒刑禍福轉手因之得
美官者甚衆前執政冠帶操笏迎謁彥馬首彥處之自
如所至倨坐堂上監司郡守不敢抗禮有言於帝梁師

成適在旁抗聲曰王人雖微序於諸侯之上豈足為過

言者俱不敢復言

宋史

政和間陳享伯為陝西轉運使創經制錢大率添酒價
增稅額官賣契紙與凡公家出納每千納頭子錢二十
三文其後行之東南及京東西河北歲入數百萬緡所
補不細今邊事未寧費用日廣請復行之諸路一歲無
慮數百萬計賢於緩急暴斂多矣帝從之至是又因經
制之額增折為總制錢歲收至七百八十餘萬緡

宋史

中興係年錄自趙開行鈔法每茶百斤為一大引令商人輸引錢市利八百文至紹興十三年遞增為十一引時物價騰踊茶商取息頗厚明年主管官賈思誠又增為十一引三百文于是諸場類皆溢額而買馬之數復不加多人但知茶馬司之富甲天下其實所收引錢視

建炎倍增後雖破敗不可復減矣

山堂肆考

初蜀茶額錢三十萬至提舉李稷加至五十萬後陸師

閔代稷又加為一百萬

同上

齊管子曰海上之國謹正鹽筴十口之家十人食鹽百口之家百人食鹽終月大男食鹽五升少半大女食鹽三升少半吾子食鹽二升少半此其大例也鹽百升而釜今鹽之重升加分强釜五十也升加一强釜百也升加二强釜二百也鍾二十十鍾二萬百鍾二十萬千鍾二百萬萬乘之國人數開口千萬也禹筴之商日二萬十口二十萬一月六千萬萬乘之正九百萬也月人三十錢之籍為錢三千萬今吾非籍之諸君吾子而有

二國之籍者六千萬使君施令曰吾將籍於諸君吾子則必罵號令天給之鹽菜則百倍歸於上人無以避此者數也

文獻
通考

孝惠帝時令女子年十五以上至三十不嫁五筭漢筭人百二十錢賈與奴婢倍筭今五筭罪之也

初筭緡錢此漢以來征權居貨之始按武帝於元光五年既筭其行者之車至是又用公卿言凡居貨者各隱度其財物之多少於商賈末作率計有緡錢二千者出

一筭於手力所作而賣者率計有緡錢四千者出一筭
嗚呼出諸途者既征其齎載之具藏諸家者又筭其儲
積之物取利至此哉

王充
論衡

喻希學淮關志凡船梁頭滿八尺者稅錢六十文

王仲舒觀察江西道奏罷權酤錢九十萬昌黎選墓誌
注一本云九千萬非

勝覽云筭簋山在治西北五十餘里有前簋後簋以山
多筭故名春時州人百十為羣入山剽取紹興間始立

筭租以贍學歲收緡錢八十千土人名為錢簋山

四川勝名

志

先是天下賦法有三曰上供曰送使曰留州建中初釐定常賦而物重錢輕其後輕重相反民輸率一倍其初而所在以留州送使之入又降省估使就實估以自潤故賦益苛齊民重困均奏禁之一以省估準物觀察使得用所治州租調至不足乃取支郡以贍故送使之財悉為上供

漢高祖四年初為算賦註民年十五以上至五十六出

賦錢人百二十為一算為治庫兵車馬

大學衍義補

孝明時盜賊日滋征討不息國用耗竭豫徵六年租調

猶不足乃罷百官所給酒肉又稅入市者人一錢凡市

店皆有稅百姓嗟怨郎中辛雄上疏以為夷夏之民相

聚為亂豈有餘憾哉正以守令不得其人百姓不堪其

命故也

同上

春賦以歛繒帛夏貸以收秋實是故民無廢事而國無

失利也故天子籍於幣諸侯籍於食中歲之穀糶石十
錢大男食四石月有四十之籍大女食三石月有三十
之籍吾子食二石月有二十之籍歲凶穀貴糶石二十
錢則大男有八十之籍大女有六十之籍吾子有四十
之籍是人君非發號令收糴而戶籍也彼人君守其本
委謹而男女諸君吾子無不復籍者也

大學衍義補


自茶為官權民私蓄盜販皆有禁臘茶之禁尤嚴園戶
困於徑取官司並緣侵擾因陷罪戾至破產逃匿者歲

比有之著作佐郎何鬲三班奉職王喜麟皆上書請罷
給茶本錢縱園戶貿易而官收租錢與所在征筭歸權
貨務以償追糴之費可以疏利源寬民力富弼韓琦曾
公亮然其策請於帝行之下三司議三司言茶課給本
收利所獲甚微而煩擾為患園戶輸納侵害日甚小民
趨利犯法益繁宜約歲入息錢之數均賦于民恣其買
賣所在收筭而不給本錢遂詔弛舊禁俾通商利凡歲
輸緡錢三十三萬八千有奇謂之租錢與諸路本錢悉

儲以待邊糴自是惟臘茶禁如舊餘茶肆行天下矣論者又謂茶戶困於輸錢良民賦不時入刑亦及之商賈利薄販鬻者少必致歲額不登經費日蹙翰林學士歐陽脩知制誥劉敞皆請除前令帝不聽會編

後漢南蠻傳曰秦惠王并巴中以巴氏為蠻夷君長其君長歲出賦二千一十六錢三歲一出義賦千八百錢後漢南蠻傳曰高祖為漢王發夷人還伐三秦秦地既定乃遣還巴中復其渠帥七姓不輸租賦餘戶乃歲入

實錢口四十



錢通卷五